



Kalaallit Nunaanni eqqartuussisarnermik inatsisip aamma naalagaaffimmi tjenestemandit Kalaallit Nunaanniittut pillugit inatsisip allangortinneqarnissaannik inatsisissatut siunnersuummut missingiutip (Pinerluttulerinermi eqqartuussisarnermi digitalimik attaveqaatinik atuineq, suliasat nassuernertut suliarineqartut, najuutinngitsoornermi eqqartuussutit, eqqartuussisut aamma najukkami eqqartuussisut tunuartussaataaerannut ukioritinneqartut il.il.) Namminersorlutik Oqartussanit akuersissutigineqarnissaa pillugu Inatsisartut aalajangiiffigisassaattut siunnersuut.

(Aningaasaqarnermut, Aatsitassanut, Inatsisip Atuutsinneranut Naligiissitaanermullu Naalakkersuisoq, Naaja H. Nathanielsen)

Siullermeerneqarnera

Inatsisartut suleriaasianni § 33 naapertorlugu aalajangiiffigisassatut siunnersuut Naalakkersuisunit saqqummiunneqartoq: Kalaallit Nunaanni eqqartuussisarnermik inatsisip aamma naalagaaffimmi tjenestemandit Kalaallit Nunaanniittut pillugit inatsisip allangortinneqarnissaannik inatsisissatut siunnersuummut missingiutip (Pinerluttulerinermi eqqartuussisarnermi digitalimik attaveqaatinik atuineq, suliasat nassuernertut suliarineqartut, najuutinngitsoornermi eqqartuussutit, eqqartuussisut aamma najukkami eqqartuussisut tunuartussaataaerannut ukioritinneqartut il.il.) Namminersorlutik Oqartussanit akuersissutigineqarnissaa pillugu Inatsisartut aalajangiiffigisassaattut siunnersuut Naleqqamiit imatut oqaaseqaateqarfigissavarput.

Aningaasaqarnermut, Aatsitassanut, Inatsisip Atuutsinneranut Naligiissitaanermullu Naalakkersuisup saqqummiinermini tunngavilersuutai inatsisissamut siunnersuummut atatillugu Naleqqamiit paarsilluarpagut.

Inatsisissami siunnersuummi eqqugaasut pinerluttuliortullu inatsisitigut pitsaasumik taamatullu isumannaatsuutinnissaasa qulakkeerneqarnissaanik suliaqarnermi Naalakkersuisut kissaateqarnerat tunngavigalugu siunnersuut una saqqummiunneqartoq oqaatigineqarpoq.



Taamatullu Kalaallit Nunaanni Eqqartuussiveqarnek pillugu Siunnersuisoqatigiit suliami matumani aamma allannguutit arlallit innersuussutigisimagaat saqqummiussummi oqaatigineqarpoq.

Eqqugaasut pinerluttuliortullu pillugit suliaq qallunaat Naalakkersuisuinik suleqatigiinnikkut ingerlanneqartumi kalaallit qallunaallu eqqartuussisarnermik inatsisaasa assigiinnerulernissaat anguneqartussaavoq ullutsinnillu naleqqunnerulernissaat taamatuttaaq anguneqartussaalluni tamannalu Naleqqamiit naammagisimaaratigu oqaatigissavarput taamatut pilerluttulerinermi suliat ingerlanneqarlutik suliarineqarneranik naammassiuminarsarneqarnissaat aallartinneqarmata inatsissami siunnersuutikkut.

Eqqartuussiveqarnikkut suliassarpasuit nunatsinnut naleqqussartariaqartut amerlasuut una alloriarfiit ilagaat uanilu Naalakkersuisuniit aqutissiuunneqartoq Naleqqamiit naammagisimaarparput tassalu pinerluttulerinermik suliap eqqartuusseriaatsikkut maannamiit sukkanerusumik ingerlanneqalersinnaanissaanut aqutissiuisoqarniarmat ilaatigut piffissamik killiliussinissaq inatsimmi uani siunertarineqarluni.

Naleqqussaanerit pisariillisaanerit ilaatigut pinerluuteqartup pinerluuteqarsimanini nassuerutigisimappagu, taamatullu nassuerneq suliami paasissutissanit allanit tunngavilersorneqarpat, suliaq najukkami eqqartuussisumit ataatsimit naammaassineqarsinnaangussaaq. Taamatullu aaqqiineq suliaqarnermik sivikillisisissaaq aamma pinerlunnernit eqqorneqartut pinerluuteqartullu ingerlariaqqinnissaannut periarfissiisussangussaaq.

Inatsimmi allannguinerimi unnerluunneqartoq takkutinngitsoortillugu, suliamut piumasaqaatit naammaassineqarsimatillugit eqqartuussiviit suliamik naammaassinnissinnaangorneranik inatsit imaqarpoq. Taamatullu pisoqartillugu unnerluussaasup takkutinngitsoornerup kingunerisaanik pineqartoq erseqqissumik paasitinneqarsimanissaa piumasaqaataasunut ilaatinneqarpoq.

Inatsimmi allannguneq aammaattaaq digitalimik attaveqaatinik atuinissamik periarfissaq eqqunneqartussangorpoq allakkat tamarmik pappialangorlugit anillatsittariaarunneranik nalinginnaasumillu allakkatigut nassiunneqartariaarullutik.



Ataatsimut isigalugu inatsimmi naleqqussaanerup kingunerissavaa eqaannerusumik pisariinnerusumillu suleriuseqartoqalernissaa taamaasilluni sulianik suliaqartarnermi piffissat atorneqartartut sivikillilernissaat aqutissiuunneqartussaalluni tamannalu ataatsimut isigalugu Naleqqamiit naammagisimaarlutigu taperseratigu oqaatigissavarput.

Taamatullu Kalaallit Nunaanni Eqqartuussisoqarfimmi eqqartuussisut aamma inatsisilerituut tjenestemanditut sulisut 65-ileereeraangamik atuuffimminnit unittarnissaat pillugu aalajangersagaq allangortinneqassaaq malittarisassanilu nutaani sulisut nammineq kissaatigigunikku 70-inik ukioqalernissamik tungaanut sulisinnaalissapput.

Tamatuma peqatigisaanik najukkami eqqartuussisut aamma aalajangersakkamut ilaatinneqalissapput, taakkumi tamatumunnga tunngatillugu Kalaallit Nunaanni Eqqartuussisoqarfimmi inatsisilerituutut ilinniarsimallutik eqqartuussisunut naligiissinneqartariaqarmata.

Inatsimmi allannguutissatut siunnersuutaasut inatsisit atuutsinneqarnerannut suliarpassuit uani saqqummiunneqartut suliasarpasuit ilagiinnarpaat taamaammallu Inatsisit atuutsinneqarnerannut suliasaqarfimmut Naalakkersuisut 2022-mut anguniagassatut takorluugaat pingaarnersiunerallu aallaavigalugu suliassanut toqqammavilersuutigineqartut Inatsisinut ataatsimiititaliami ilanngullugit nalilersorluarneqarlutillu suliarineqarnissaat Naleqqamiit innersuussutigerusupparput.

Taamatut oqaaseqarluta Inatsisinut ataatsimiititaliami suliarineqarnissaa Naleqqamiit innersuussutigaarput.